

Na temelju člana 17. stava (5), člana 32. stava (4) i člana 52. stava (4) Zakona o oružju i municiji u Hercegovačko-neretvanskom kantonu ("Službene novine HNK ", broj 5/2017), ministar unutrašnjih poslova na prijedlog komesara, d o n o s i

## **PRAVILNIK**

### **o načinu i uslovima za siguran smještaj i čuvanje oružja i municije**

#### **DIO PRVI – OSNOVNE ODREDBE**

##### **Član 1.** **(Predmet Pravilnika)**

(1) Ovim Pravilnikom utvrđuju se način i uslovi za siguran smještaj i čuvanje oružja i municije kod pravnih osoba i poduzetnika koji nabavljaju i drže oružje i municiju po odredbama Zakona o oružju i municiji u Hercegovačko-neretvanskom kantonu (u daljnjem tekstu : Zakon), odnosno pravnih osoba i poduzetnika koji se bave prometom oružja i municije, popravljanjem i prepravljanjem oružja, način i uslovi za siguran smještaj i čuvanje oružja i municije koje drže i nose fizičke osobe.

(2) Odredbe ovog Pravilnika ne odnose se na pripadnike agencija i drugih pravnih osoba za koje su posebnim zakonom ili propisima donesenim na onovu Zakona regulisana navedena pitanja.

#### **DIO DRUGI-SMJEŠTAJ I ČUVANJE ORUŽJA I MUNICIJE**

##### **Poglavlje I. Pravna osoba i poduzetnik**

##### **Član 2.** **(Smještaj i čuvanje oružja i municije)**

(1) Pravne osobe i poduzetnici iz člana 1. stav (1) ovog Pravilnika dužni su da drže i čuvaju oružje i municiju u prostoriji koja je osigurana od požara, krađe, pristupa neovlaštenih osoba i svake druge opasnosti i zloupotrebe.

(2) Pravne osobe i poduzetnici dužni su odrediti osobu koja se brine o izdavanju, preuzimanju i čuvanju oružja i municije, kao i vođenju evidencije o oružju i municiji koja se izdaje na korištenje njihovim zaposlenicima.

##### **Član3.** **(Uslovi za smještaj i čuvanje oružja i municije)**

(1) Poslovni prostor za promet oružja i municije sastoji se od prodajnog prostora i skladišta koji moraju činiti jedinstvenu građevinsku cjelinu.

(2) Oružje i municija koje je nabavljeno radi prodaje čuva se u skladištu, a može se čuvati i u prodajnom prostoru pod uslovima propisanim ovim Pravilnikom.

(3) Oružje, djelovi za oružje i municija pravna osoba i poduzetnik čuva se u skladištu koje mora ispunjavati sljedeće uvjete:

- a) da zidovi i plafon budu izgrađeni od tvrdog negorivog materijala (cigle, betona, kamena i slično) minimalne vatrootpornosti zidova od dva sata, stropova i podova od 1,5 sat, a otvora od 1 sat;
- b) da su prozori ukoliko postoje zaštićeni pokretnom metalnom mrežom s vanjske strane prozora debljine alki najmanje 5 mm ili fiksnim rešetkama, najmanje debljine šipki 10 mm;
- c) da vrata prema vanjskom prostoru budu zaštićena kako je to propisano u tački b) ovog stava, s tim da metalna mreža, odnosno okvir s rešetkama mora biti jednim krajem učvršćen za nosivi zid, a drugi kraj mora biti zaključan sa dvije brave;
- d) grijanje ukoliko postoji, bude izvedeno samo uređajima na toplu vodu, vodenu paru ili topli zrak koji se ubacuje izvana, tako da temperatura vanjske površine uređaja ne prelazi 120°C, a temperatura zraka koji se obavlja zagrijavanje ne smije biti viša od 54°C;
- e) električna instalacija umjetnog osvjjetljenja skladišta mora se izvesti u stepenu zaštite IP-54 prema važećim standardima. Uključivanje rasvjete mora se izvesti i izvan skladišta. Nije dopušteno osvjjetljavanje prostorije otvorenim plamenom;
- f) da za smještaj oružja i municije postoji metalni ormar odgovarajuće veličine s bravom koji je pričvršćen za pod ili zid prostorije u kojoj se nalazi.

(4) Oružje i municija može se čuvati i u prodajnom prostoru koji nema skladište ukoliko su ispunjeni sljedeći uvjeti:

- a) da je prodajni prostor izgrađen od negorivih materijala,
- b) se u prostoru nalazi jedan aparat za početno gašenje požara tipa S-12, i dva aparata tipa S-6,
- c) da je prodajni prostor odijeljen od ostalih dijelova protupožarnim konstrukcijama vatrootpornosti zidova od dva sata, a stropovi i podovi od 1,5 sat;
- d) da za smještaj oružja i municije postoji metalni ormar odgovarajuće veličine s bravom koji je pričvršćen za pod ili zid prostorije u kojoj se nalazi.
- e) prostorija bude praćena sa video-nadzorom i osigurana alarmnim sistemom zaštite.

(5) Oružje i municija mogu se izlagati u poslovnim prostorijama samo tokom radnog vremena. Izvan radnog vremena oružje mora se čuvati u zaključanim ormarima ili u priručnom skladištu. Puške se mogu čuvati u poslovnim prostorijama izvan ormara, ako su povezane čeličnim užetom ili lancem koji je provučen kroz branik obarača. Čelično uže ili lanac moraju biti pričvršćeni na fiksnu podlogu (zid ili pod prostorije za smještaj oružja) i zaključani na oba svoja kraja.

#### **Član 4.**

##### **( Način smještaja i čuvanja oružja i municije)**

Ukupna dozvoljena količina baruta koji se nalazi u municiji ne smije prelaziti 20 kilograma u poslovnim prostorijama u kojima se vrši promet, držanje i čuvanje oružja i municije.

#### **Član 5.**

##### **( Nadzor)**

Pravilnost čuvanja oružja i municije i vođenje Zakonom propisanih evidencija utvrđuje Komisija iz člana 8. ovog Pravilnika najmanje jedanput godišnje i o tome sačinjava zapisnik u tri primjerka od kojih jedan predaje vlasniku preduzeća, jedan ostavlja u svoju arhivu, a treći dostavlja ministarstvu u sjedištu.

## **Poglavlje II. Fizička osoba**

### **Član 6. (Čuvanje oružja i municije)**

(1) Fizička osoba koja posjeduje oružje i municiju u skladu sa Zakonom mora isto čuvati tako da nije dostupno osobama koje nisu ovlaštene da ih posjeduju, a posebice djeci i malodobnim osobama.

(2) Oružje i municija moraju biti odvojeni i zaključani u metalnim kasama, metalnim ili drvenim ormarima, sefu ili sličnom spremištu koji se ne može otvoriti alatom uobičajene upotrebe.

### **Član 7. (Prostor za čuvanje)**

(1) Oružje i streljivo čuva se u stambenom ili drugom prostoru koji se nalazi u mjestu prebivališta vlasnika oružja.

(2) Ukoliko se oružje čuva u drvenom ormaru, ormar mora biti od punog drveta, sa metalnim okvirom po ivičnim dijelovima, da se zaključava sa sigurnosnom bravom koja ima najmanje dva mjesta zaključavanja.

## **DIO TREĆI - NAČIN UTVRĐIVANJA USLOVA SMJEŠTAJA I ČUVANJA ORUŽJA I MUNICIJE**

### **Član 8. (Povjerenstvo za utvrđivanje uslova)**

(1) Uslove za siguran smještaj i čuvanje oružja i municije propisane ovim Pravilnikom za pravne osobe i poduzetnike utvrđuje Komisija koju imenuje ministar.

(2) Uslove za siguran smještaj i čuvanje oružja i municije propisane ovim Pravilnikom za fizičke osobe utvrđuje policijski službenik neposrednim opažanjem na licu mjesta o čemu sačinjava službenu zabilješku (Obrazac 1).

(3) Komisija iz stava (1) ovog člana sačinjavaju četiri člana, koji imaju svoje zamjenike od kojih se dva člana biraju iz reda policijskih službenika, a druga dva člana iz reda državnih službenika.

### **Član 9. (Zapisnik o radu Komisije za utvrđivanje uslova)**

(1) O utvrđenom činjeničnom stanju, Komisija iz člana 8. ovog Pravilnika sačinjava zapisnik.

(2) Ako Komisija utvrdi da poslovni prostor ne ispunjava uslove propisane ovim Pravilnikom, to će navesti u zapisnik i odrediti rok za otklanjanje nedostataka koji ne može biti duži od 30 dana.

(3) Ako u određenom roku nedostaci ne budu uklonjeni, ministarstvo će rješenjem odbiti podneseni zahtjev.

## **DIO ČETVRTI- PRIJELAZNE I ZAVRŠNE ODREDBE**

### **Član 9. (Prestanak primjene ranijeg propisa)**

Danom stupanja na snagu ovog Pravilnika prestaju se primjenjivati odredbe Pravilnika o postupku izdavanja prethodne saglasnosti i odobrenja za promet oružja i municije, evidencijama prometa i uslovima za uređenje poslovnih prostorija za promet oružja i municije ("Službene novine HNK" br. 6/12) koje se odnose na izdavanje odobrenja za promet oružja i municije.

### **Član 10. (Stupanje na snagu)**

Ovaj Pravilnik stupa na snagu osmog dana od dana objave u "Službenim novinama Hercegovačko-neretvanskog kantona".

Bosna i Hercegovina  
Federacija Bosne i Hercegovine  
HERCEGOVAČKO-NERETVANSKI KANTON  
MINISTARSTVO UNUTRAŠNJIH POSLOVA

Broj :  
Dana :

**MINISTAR**

**Sladan Bevanda**

